

玉茗堂全集

玉茗堂全集

臨川義仍湯顯祖著

序

吉水豐家族文錄序

湯殷人之後也。武王封微子於宋，命之曰：惟汝象賢，修其禮物，慎乃典常，作賓于王家，統承先王，永綏厥世。而本原其德曰：恪慎克孝，篤不忘。

文

二卷

凡以悲憐微子之微傷先王之後不傳而以其
文物典常與宋令世世守之雖與國咸休可也
其後微子歲時朝周威儀甚備周之王者儼然
容而歌之陵夷至于春秋宋襄公行仁義焉正
考父爲之追道作商頌孔子始承其衰憂其殘
錄于周魯之後曰予殷人也予學殷禮有宋存
焉之宋而不足徵也則文獻之不足故也是故

之周而學周禮得老子焉因而述殷周之事蓋
老子者老彭也以殷大夫入周爲柱下史而又
生長宋毫閭閻兩代之事其壽又足以存之孔
子因而得文獻焉嗟乎國家之有文獻也猶人
之有精華氣脉也嘗其亡雖以王命之勤渠始
封之恪孝而不能必其後之子孫謹守而足傳
當其存之也則老彭一人焉可也吉之永豐有

吾宗焉魁然大矣起宋平叔以來幾二十世譜
凡五六易矣而其先後文雅彬發與所爲名賢
交友積文成林思有以譜之未也蓋萬歲辛卯
予謫尉于雷之徐聞道陽江見吾瑞家兄而愴
然問所爲世者且曰吾二十世祖平叔以宋亂
護從如西而留吾子之先倘是耶予未有以應
第曰元季譜牒散亡予祖文德友信公父子耳

知與益紹父子後先焉否也然因以世陽江君
爲兄而陽江君亦以弟厚予君儒者爲縣令三
判州一皆以清強去官而其從兄掌故君敦敏士也
者以浙之嘉禾諭來授于撫掌故君敦敏士也
一日悵然有請于予曰以不腆之家經宋元而
來其魁梧耆宿于兵火屠僇之餘流離散亂然
終以接屬完聚三十里之

其系屬昏因廬舍

冢祠皆可得而覆也則譜之九在焉獨文苑之
錄闕如不修吾弟陽江君流涕於此久矣有志
不就吾爲學官掌故無所與于國之典若獻獨
不可以徵吾家乎予聞而愧之已而睭然欣之
曰嗟夫此宋杞之所不能存而故家流風所爲
與國幾焉者也桀匪洗墨傳之數十年世以爲
寶而況于文章亦以流寫其時之風政諱俗與

其人之終始後世或因以一人之事知其鄉國
以一家之事知其國其爲寶也不亦大乎雖然
予有觀于盛衰之際矣蓋予祖茂昭公言予江
南之湯皆唐殷公文奎之後也公之子悅仕南
唐以文章高世國亡從其君入宋藝祖憲曰尚
不知我先人諱耶乃改殷爲湯官其父子于宋
御醫平叔其後也餘子多留江南者而予先祖

適以南唐使之錢王所國亡遂留錢塘不歸靖
康之亂以族從康王孟后如洪如臨之旰食以
故大江之西多吾氏而大則文奎公之裔也而
此言之吾人之得世其家也不亦難乎時經喪
亂流離伏匿或從其君或從其父兄子姓昏困
或予其身所在爲可以免而是矣彼其居之不
能守而能有此文獻乎微其居而已新故諱避

之際將其好是易然則雖有世家其文獻之事
與亡固將有待于國也豈獨其家之人能存亡
之耶雖然宋元亡而予宗之文物有在者焉則
謂掌故君爲吾宗老彭可也

周青萊家譜序

歲在壬寅比部郎周竅六先生爰先予之意予
其宗秩而譜之成以示予邀邀乎其欲予序之

也予讀君所自爲序者自姬受姓而東至于今
號爲賢士鼎門者皆在焉而安仁臨川之有周
氏則自揚吳時始平湖之有周氏則自勝國始
入我明而以科甲顯者則自廉州守宗武比部
君始嗟夫當揚吳錢越之相兵海內如沸藐然
一峙寄身臨川之戰坪蓋瘡痍燼燬之餘形影
存亡所不能旦夕計也而竟以遺其宗得至勝

國贅于平湖以成大姓而有今日盛衰絕續存
亡之際豈可料耶吾聞之留士氏以陶唐氏之
後爲留世卿不可爲不盛矣叔孫穆子以爲在
三不朽非其祿而已也然則族之爲世亦其中
之有人焉可以世云耳徵于周氏有人三焉宗
武以乙科爲瀏陽令卒廉州太守所至有公方
苦節之頌死無以塋妻子至爲人舂紼以活予

謫雷陽閨其所爲戒吏士者曰昔人以不貪爲
寶何必合浦之珠海生珠而不淨蚌生珠而不
全況乃非人所生而欲有之耶廣之吏士聞而
化之若廉州公者可以爲周氏之一人也其從
弟宗鎬予友也於古帝王將相儒者之略無所
不窺談天下事阨塞如在履席老而飢自號無
懷氏於玄同性命之際藏其身死固無以葬也

謂其子曰吾無所負于人止負某氏六斛粟
反之子如命予爲立石表之云生不負人死不
愧尸若無懷氏者可以爲周氏之一人也而比
部君歟六者於前二君爲從孫亦予友也性奇
穎有氣力能挾發古今奇隱光怪之書爛爲文
章成一家言瑯琊王長公世所稱能文字譏評
人者也至于序比部之文則曰雄博辯麗或才

溢而不自禁然皆能以其才極其諸思必物表
辭必境外其爲世所推豔若此竟以論劾盲相
太宰失官乃築鴻乙臺爲樓三成以居有終焉
之意若比部君者固可爲周氏之一人矣天下
之生久矣有一於此可爲有人况其三乎有一
人於此可爲有姓又况其三乎予無能徵遠試
近而徵于州之爲大姓者可得而知也爲吏而

廉未有若廉州公之爲烈也士而隱未有若無
懷氏之秀而貞於大章爲其家言亦未有如比
部君之篤者也嗟夫周之子孫倘思其所爲世
者而存之乎高麗顯融士氏之世祿其未有窮
也予欣言序之亦庶以不朽云

大司空心吾張公年譜序

易天下之至健者乾至順者坤健易而順簡然

而知險以阻者必此焉在也視天下屈身進退
之際變化遊移皆非尋常體勢所測知者知其
畫然者耳如盱新城張司空生平所爲興起生
全本末大致家國兼之其中可異者數焉公家
世盱而母夫人閩也皆大姓富厚大公乃喜破
賣生產而日袖其奇零金施貧子于路當誕公
時夢蛟龍鱗甲燦然堂椅間言于諸從皆駭之

曰何妄意此及公五六歲時母夫人遂乃居姑
而爨至就食外家以沒公十歲餘孤苦廢學久
乃學于姑氏草次與聘婦而會有聞言雖中表
名德時亦莫盡其惠公初學殊無類名至以溜
爲石之鑽流涕自喻感動良師已若有神人見
夢相爲開發者連第而去爲仕族名家兄此皆
其家世衰興有不可相知者初令婺源治行循

異然不爲分宜相國所喜竟得徵拜殿中侍御
史行鹽河西分宜敗世宗大開言事者路而
公疏爲二三言者趙公錦吳公時來等洗雪乃
反以爲遊說見遠獨身就詔獄分死矣卒以華
亭徐公目授朱衛使得不死杖下復爲世宗
遺詔起廢首用公等公爲言去新鄭高公一時
號爲靜理已乃徐廢而高興遂有考察言官之

請而公以太僕少卿與魏公時亮周公世選
日等俱坐言事時不謹廢蜀趙文肅爭之不能
也旋爲穆宗遺詔不及起廢事如是歷十年
所江陵相用事尤不喜贛直益用考察不謹例
錮言事者謂公等終置林涇間已矣江陵相物
故後二三年而前吳趙魏周等諸公皆起暴貴
公亦以中則推舉累官至南京少司空而公亦

意識敦遠樞機周慎優游無事之時待次部卿
之地殆謂休休者所必庸侗者可以無及矣而
竟用京察時中言者以去此其身與國事相與
舒慘起伏轉易尤有不可知者然公乃得以歸
之逾年年始六十爲長君娶婦更舉少君日從
鄉里父老賓客高會池亭間極偃蹇貽宕之至
前已爲先人兄弟大治家舍迎壻母夫人于閭

而益復自起冢宅偉麗歡樂其下年且七十撫
然曰吾行矣視蜀木爲材髭畢而逝嗟夫公爲
人至性外順內健與人素幾易親而可從顧前
後遭歷夫嘗不險以阻阻而因以通險而常以
夷蓋乾坤之候家國之變大故若斯之難也爲
人先者要以推訥好施與相貽必食其報爲人
後者常以忠直篤行自致休顯當益長是則其

盡然可知者讀張司空歷年考本末尤信云

睡菴文集序

欲殺衆何意千秋某在斯此非霍林前時過江
之句乎去予數千里不見其人而壯其心時有
所不怡亦復吟此自壯故歲則其門人旌德劉
生敦復崇仁王生士煥先後從予遊問霍林容
貌言笑在長安安否皆言吾師清顏美髭與諸

生談常恆夜旦遊日益廣而貌故加肥予喟然
而止之曰以予所聞霍林道心人也道心之人
必具智骨具智骨者必有深情所與子墨流連
相爲綽約耳雖然亦非世人之所欲得也已而
以南祭酒出書謂予題其睡菴文咏予爲拊几
迴翔慨然有東下意蓋前聞李公本寧以有所
不賺留寓東間霍林復爾皆予所未見莫由夢

錄者逾年春而霍林復爲世人所疑罷官矣於
是天下有識之士起爲不平而予特甚何也霍
林者道心人也孝友廉貞足世師表而當何疑
于世乎跼然吾有以語此予前在長安嘗誦詞
林表董二君曰君等苦道心不善堅固文趣不
過奇拔黃閣有何重慕哉世之疑霍林者悵其
黃閣耳亦太早計予以霍林文家推之其福德

常在乎彼人者何以明之見其初第時數作散
如也至爲其三人作難脫刺客于枯廬破衲之
中幽思顯詞達然而通瀕沓捷疾歷礫曉忽可
啼可笑若出若沒大非前館閣中常設者矣予
猶意其翩連而貴世樂所誘或忘其智骨焉已
乃讀其文咏種種異之篤于功名世法之外有
以秀鬱而蒼發或千餘言旆如其舒或數十語

恍如其詘如霧流烟如雲漏月如洗峯嶽如拱
塊北雖其穢積衍按尚未極其曉世之情其必
不爲世人而爲道人文人也決矣至于韻語短
長率意受律氣力沉厚班駁蕭瑟成其家言方
前過江時復已度越矣大致羞富貴而尊賤貧
悅臯壤而愁觀闕此其人胷懷喉吻中殊有巨
物豈區區待一黃閣而後能與世吐咽者與至

其沉冥病中詩猶有西舉似者平生事倉卒黑白不成一死終無辭安得朝聞道夫以欲聞道而傷其平主此予所謂有深情又非世人所能得者也嗟夫霍林之于道于文何如也發端未識得其里人與之患難而追之起功力未竟得朝貴者與以賤貧而恣之成彼人者無乃過爲福德與是睡菴可以慨然適然以山川爲氣

質以烟霞爲想似以玄釋爲飲食以笑嘆爲事
業縱橫俛仰槩不由人道與文新文隨道真情
智所發旁薄獨絕肆入微妙有永廢而常存者
然則所謂千秋某在斯者彼人何與耶然彼人
者必曰子何以知其必千秋也又曰卽其饒爲
千秋吾且困以今日之事嗟夫以此相難者往
往而然又非予所得而言也姑言之以爲睡夢

文字序

騷楚室寶序

太史公以屈平正直忠智以事其君信而見疑
忠而被謗能無怨乎離騷之作蓋自怨生也國
風好色而不淫小雅怨誹而不亂若離騷者可
謂兼之矣嗟夫此有道者之言也天下英豪奇
瑰之士苟有意乎世容非好色者乎君父不見

知而有不怨其君父者乎彼夫好色而至于淫
怨其君父而至于亂者則有意乎世之極而不
得夫道者也至于宋玉景差之招覓實誼之弔
屈雖興廢異時有所憤惻迫發于其中一耳歟
後招隱哀時思沉調急先漢之人能爲楚聲餘
則賦而可矣故賦者騷之流而微異者也榆林
杜君韜武以武爵貴介公子躬上將之姿而好

左徒之業爲五獄遊楚詞山中吟數卷名之曰
騷苑笙簫其言序則以屈原離放傷悼家國有
所不平而身當國家盛際信而蒙信忠而見忠
無牢騷伊鬱之思有瀟灑優悠之致引類比義
宜與騷遠原其攄懷述志時而放言獨往亦未
有遠殊也誠有然者羽人乘遊則閔風崑崙之
軌也餐霞蘭生則雲中堂下之思也次第有作

靡不流離炫爛窅貌偃蹇就中辭義曲致宛爲
正則之遺蓋無所好而自不至于淫無所怨而
自不至于亂至其音清節和無攜無逼真有氣
逐指而成笙思在口而爲簧者殆非悲笳橫吹
之助與予有概乎此風雅之道息聲貌流絕屈
大夫獨與其弟子依詩人之義賸源發波崩煙
決雲爲千秋賦頌弘麗之祖文則盛矣當其時

堯舜道德之純粹未得爲懷襄用也言殺張儀
止王無西而止願是時楚獨無將其將唐昧景
鈇輩戰死武安君且來屈子之材誠曰國亦未
能當也蓋文盛武不能無衰賴封疆之靈韜武
從容詞旨有墨卿文士所遜避者至其登壇秉
麾鎮虜禽敵居然宿將風以一少年公子而文
武兼盛諒非有殊絕于人者不能將萬里一疆

神明倍強古之所難今之所易與夫戰怨事也
昔人有臨陣必先被髮叫天抗音而歌左右應
之歌畢然後進戰其氣然也誠得騷之意而行
之悲惻排盪憤懣噴薄馳而入三軍之中援玉
桴兮擊鳴鼓誠旣勇兮又以武要未足爲兒女
子道也或曰韜武積精於道於騷所爲托遠遊
而含朝霞者如將遇之若然則韜武固異日之

莊騷也茲之笙簧殆劍首之一吹也予何足以稱之

滕趙仲一生祠記序

天下風土相遙資幹懸絕常千里而同心目至而意授或共生同地受同材乃顧有覲面而不親把臂而相忤何也知不易知也是故趙仲一世所謂精神才力體貌殊絕之士而最能與仲

一相難苦不合仲一得少舒其長慨而發其壯
心者亦皆朝廷精神才力體貌之士且時有西
北諸君子焉而予故江西男子也與仲一非有
所習適吳君繼疎以吏部郎再過家詢朝士未
嘗不言仲吳問予曰子何以知仲一之深其以
亭侯橋道館舍厨傳閣之修好耶團乘而道機
之盛耶予曰固也予前以上平昌再歲計道滕

弱人也與仲一相遠何啻三千里能一見而知
之不知者乃在其所近而氣力相埒者詩不云
乎我行其野言采其蓄不思舊姻求我新特誠
不以富亦秭以異蓄雖苦菜而有異味不在多
采我知趙君一人爲足新而能知舊所不如合
茲予與君皆棄在野無所托言因滕人之祠君
也偶爲激發如此若乃祠之春秋田夫棄女坎

坎而鼓之蹲蹲而舞之自有勝之風在矣

趙乾所夢遇仙記序

世何夢而得仙又何仙而得遇有說乎仙人往往聞其名未見其人所謂見其人者皆夢也而未能有所遇山澤多枯癯迂怪之士時至朝市雖吾亦遇其人者二三人要與禪寂異其人類多壯偉矯厲能行其氣者殆非羸素人所堪清

淨少恚怒嗜欲節服食良藥自輔訓吾所爲也
也然則何人而仙耶趙彭所自言哀部時秋病
甚神氣委頓殆絕自念平日授中黃術垂目瞻
輪渥固紫齒提攝幽戶踰時稍定白湯一杯引
氣自溫中夜粥一盂活矣逾年夢于故讀書處
何仙姑授藥一片類桂皮其大若掌食之香徹
五內旦起覺精色迫暢欣欣然若有所得者觀

記異之君言修黃中久示予臍間若胎有年何
得更病血下至數簞不當引而化之乃至委絕
不屬而更行禁閉引取溫飲爲助將所謂查崖
欲去耶仙姑初不知何許人予遊羅浮見香山
何氏子孫巾帶者爲言姑無他異少黧瘡不可
行汲或授以底簍云撈米得珠可服不饑信之
果然面改如玉步有金光一夜亡去見于零陵

數百年矣而見夢真寧此亦西方美人之思也
約論之趙君乃前所謂壯偉矯厲能行其氣者
而懷仙精炯遽然夢仙情理之常要無足異至
其言曰月之光借日之明人之生借心之知所
存者神所過者化如有所立卓爾能言及此其
必有可得而遇者耶嗟夫千世而遇一人焉猶
旦暮遇之也百歲而夢一人焉猶旦暮夢之也

劉氏類山序

古人成言成書皆於理所蘊發者求之天地萬物之品族巨細先民之訓若志顯隱涉廣而造微有得乎內而動乎外者引類以應如博依安詩雜弄游絃若其自有非先有所記而蓄之時然後披而掇之也世遠載籍日以博爲少日以華卽有厭而反之者終不能以澹齋取勝又資

日薄而學日以淺其素於蓄而取之也不能如
古人之自然類書之興此其尚矣類書興而天
下之讀書者廢讀書者廢而天下類書愈不可
廢也蓋齊梁間君臣士友往往以隸亭見奇雖
贖贖如高齊亦有華林脩文之役代相層積北
堂初學遂分門標舉一二十大書而疏所從來其
於采擇引取良便以吾觀劉燕及先生所爲類

山虞徐之流亞也然世南以秘書弘文日游省
閣清高玉冊之林而堅乃以學士奉詔與諸人
分次流略其爲書也有資而易成若劉先生成
是書也來令宜川未能以期月耳冠蓋期會之
所馳逐簿書校稽之所結約宜雖鄙亦必有以
煩心思而縻日力者乃于自公暇餘盡舐家藏
圖書雜記目捷手敏三月而書成其于天地萬

物之品族先民之訓若志皆有以涉廣而造微
熟復之足徵世以所不知而辨人之所不釋非
有資于殿省之祕文奉詔書從事而獨智以集
豈齊梁諸賢所難而劉先生顧易哉亦其天性
嗜學有殊絕者考之先生世家子政玄靜而後
惟唐開元中崑山令綺莊爲集類五十餘萬言
上之朝似先生之在宜川也劉氏其世美也乎

雖然有進于是者在宋吾邑多嗜學而晏元獻始用文章執政曾子固爲序其輯要言公于六藝太史百家之書旁及佛老佔藝蠻夷之荒忽詭變而終以三才萬物是非興壞之理顯隱巨細皆有委曲蓋其得於內者如此士不素學而處從官大臣之列脩文儒道德之任其將能乎若先生之學必有得乎內而成乎理者起而爲

大臣師儒資覽略藻風澤古今人亦未有以相
遠也先生且以能治劇徙臨故敢以元獻事爲
祝而因以借引其端云

雲聲閣草序

天下之物最大者無如道與法希微淵淪僚忼
淳鬱道之存也剗錯瑩塋方儼員幅法之持也
法與道際可以言心可以言天下心與天下道

法之所管也性命功實節烈名譽之士無一不
在乎是時一意之時一至之皆足以有言於時
而况其存與持焉者哉余從丁紫崖明府燕言
得讀張文石先生雲聲閣諸作有當乎心與天
下者耶若爲詩歌光祚流離峽北旁薄子墨之
徒習之不可能也名理在宣尼文釋之間其不
一而一不入而入非知之所得言非言之所得

知也言事大者乃爲許相國語定 太子宗社
至計爲郡國談丘賦開澤之政著系記里閭閻
家巷之行雜寫鍾劍優冶之奇靡不騁古今之
倪略揚雅俗之趣會盤紆而莫抗躋而莫其所
爲心與天下者殆有以存有以持非慨然言之
一致而無餘者也蓋先生爲郎著節歸與吳越
間諸君子講性命學本乎無欲歸乎無極本乎

無極歸乎無欲嗟夫其於道法之際久矣容容
冥冥吾且聽雲之爲聲

易象通序

人之生而目理澤亦無以大異而所好玩殊遠
士之於書凡民之各其業有所好之有非全乎
好之者也得已則已其風雨旦暮矻矻然而不
已者其有不得已者乎貴游之家去四民之業

而好狗馬聲伎博塞狗馬聲伎博塞其利于養
也不如農民之業其利于智也不如音然而有
好乎此者何也得已者在彼則不得已者在此
吾獨愛 驪王之孫有如用晦宗良貞吉三君
者去貴游之家所好而好古書傳然技止以詩
行于公卿布衣之間游其名至於文字之所起
理義之所變探賸而鉤深刻意而成言亦有時

乎未暇也最後鬱儀王孫好揚雄氏之學方言
奇字多所訓明撫然而歎曰文字之所起者豈
也理義之所變者易也通于膏而蔽于易不足
以診天地人物之變乃追而學易凡子夏所傳
九家所爲變象互體者潛測幽討不遺餘力久
而槩括彷彿爲一家言名曰易象通蓋能極暢
其意之所欲至亦可以有傳於世矣豈其不得

已于書而矻矻焉者乎此所謂好之者也雖然
方海岳子未成此書也散然而傲晚敦然而居
休倫黨堂除之間愉如也書成而嘖言且起拘
然以悲脩然以貧豈所謂作易者其有憂患乎
抑鬼神之害盈乎海岳子能明易必有以通其
故矣

劉大司成文集序

文

二卷

二

士和司成兩都兩都士稱爲允陽先生先生言
道德而近名法常曰學士先志官先事空文何
爲蓋其天性廉毅貞穆生於吉州忠孝之鄉而
道學之世故其言動出入必以形影相格不肯
流逕而之他其教然也予性故馴而遠官南都
與之遊于世俗嗜好一切無所當好談天下事
與天下賢人而已予稍爲通之引與達觀先生


遊倘識所爲西來意者時亦爽然自失然終東
於其教取如也今其遺詩文若干首具在蓋士
和之去國與被病皆出意外倉卒不克自定其
文然所存者亦可以知其所亡矣所亡者其人
則東漢之人所存者其文則南宋人之文也而
先是海內人士稍稍傳其與政府諸執事疏記
指發端委稱引連類網維大細之弛張人材善

文

二卷

三

否之進退惘歎焉流連焉彼其身未嘗一日當
天下事任而其心不忍一日付天下之事于不
治蓋至於言而躓動而窮然後歸而嘆曰吾讀
養生家言矣最後探旌陽令至德觀宿張道陵
龍虎山中上追洪厓驂鸞之跡下睨僊巖遺蛻
之處嗒然有思泫然而悲曰死生亦大矣吾無
以處吾心又何以譏稱爲將招予從汗漫之遊

竟長生之事曾幾何時而以無妄之藥已矣傷
哉天地雖云大無之寄此身此非吾兄詩識乎
不問家人產誰要國士知此非吾兄心行乎孟
子曰誦其詩讀其書不可不知其人欲知其人
論其世然則士和之所爲人及其所遭遇之世
於士和之書之詩其能無愾然長嘆者者
何人吾亦忍涕而待之耳

玉芳堂全集

臨川義仍湯顯祖著

序

趙仲一鸞唳草序

陸平原山海異才爲河間嬖人讒死兄弟嘆曰
欲聽華亭鶴唳其可得耶趙仲一如相如抱璧
睨柱幸不碎問道而西歸陶穴躬耕黃冠草服

文

三卷

一

猶得聽山河鶴唳飲靈湫嚼金絲草平原有是
乎趙君偉客顏性孤到雄邁然好禮下士與人
嘔嘔如也故其去國朝士悲焉道侶疑焉諸生
野老苟有識者咸用喟焉牢騷於書疏廻翔乎
咏歌秦夏殊詭玄釋增異得若干篇門人總之
爲鶴唳草言嘹唳也其悲如唳焉白露警而鶴
唳清知霜雪之將至也雖然亦顧其地與時吾

當受選吏部旅立軒墀之上有白鶴焉引吭而
鳴疏翎而舞高趾遠聽修然百禽之外已而顧
之以稻梁注之以潢潦未嘗不味之而就視也
孰與夫不好鶴者放之嵩華江海之間乎朱冠
縞衣絕塵滓之色良宵清晝發清迥之音若斯
者固亦俗士之所不能有而邇人之所不可無
也惡知鶴唳之不爲鳳歌也乎聞之鶴仙禽也

異焉者以胎化君嘗坦腹示予曰吾結胎久覺
五內如玉鼻嘗聞異香暗室瞳子有光若蜚雪
然則君之爲羽衣也其亦近與顧書示予爲取
債家所苦鬚髮盡白面目焦黑懊喪呻吟不能
自休者何也嘻此其所爲鶴唳也與

滕侯趙仲一實政錄序

佐王之才常寬而取伯之才常急非有相反其

時與地固然寬之無宜以絀猶急之無宜以縵
也蓋昔桀紂之法胥亡而亳鎬之法常在伊萊
旦奭之輔固得以從容而鋪德義敷絜而登太
平及其時天下已定法制已信風俗已成如是
而誅之如是而賞之俯仰之間益可以休然而
無事矣幽平之後先王雅頌之制衰廢無存諸
侯相攻并敵者先亡勢不得不急法而治時則

伯才興焉齊管仲楚吳起秦衛鞅三人者其著也大致亦周官正地比受官成畫一千經畧會計之意而急持之歸于富强其國曰誅殺不必則令不信不信則不行如是則國弱令不行雖有地力不可得而盡也如是者國貧貧則事雖小不可舉事雖小不可舉則是與亡國同也是故三人者急持其國而用以富强如晉文公之

伯晉子產之存鄭皆是也後世諸葛武侯以用
蜀而王景畧以用秦至王荊國以用宋而效異
者何也勢不行也伯者審勢急可以趣其國不
可以卒治天下國狹吾之所得急爲天下大非
吾之所得急爲也如以王公自治其縣青苗固
效專之方岳則均輸方田無不可者專之邊疆
則保甲保馬無不可者何也勢所得爲也是故

舉天下而急爲之安石不能用朱取一國而急爲之趙仲一可以用滕今且語天下以滕公之政吾嘗以於越長上計過滕時公上事一歲耳大禳之後人大相食公爲乞漕粟大府錢施其民間公庾庫中無如也徐起與吾北去更三年而再計止滕待公不能得見後堂主籍者約視其牘積金乃至羨贏三千穀踰六萬予啞然而

駭曰是何與之暴也主者曰公所費修治公私
署候禮際惠振收恤士民爲民贖子婦所亡失
立菱舍牛種以業流集者復不在是予益異之
移以富一國又何國而不遂以富乎退而謂滕
人公何以至此對曰凡田賦影避盛則有所遁
而後期公奮議度田上下相傾動恐喝不可而
公輒已單騎從所在父老行度之名其田有倨

文

三卷

五

而撓者公故怒容渥丹奮髯眉相抵撓者行避
去故壤則而賦平不比而爭輸羨若鍰一錢以
上率以糴故異羨而粟流又公深民桑柳有籍
數去縣十餘里要人孺子戲折其四五樹圍捕
之償十五栽而後止罰必而先貴故民不犯所
在賦饑人弼治堦河皆獨身馳數十里察視曉
夜暴露不少休故民無欺而不怨衣褐食禪而

官館馳傳。豆咏歌之節必明。以清故民儉而
知禮。語未卒。予撫然而嘆曰。此伯才也。乃先公
行爲載其牘。長安以示執政。張公張公曰。此固
當以節錢盡其任。幸少須。且以御史行邊。專屯
田鹽筴。開塞之事可也。已而事移。官止吏部郎
以廉梗。訐激執政。不可復容。罷官去。嗟。夫人有
如此才能。盡之于法而不爲盡。何也用非其才。

也今夫以貧弱之滕三年而暴富誠委之一二
大鎮其行法益巨三年當不異滕富強之效所
求于臣者重而所求乎人者輕然而終無亡敝
之憂者固將曰天下已定風俗已成法雖有所
緩失亦未見急之能爲也嗟夫言治滕者異矣
皆以公才且老而非當急才之時不幸而可悲
然以予意之公雖進不得如管葛諸公主臣一

心光贊盛業退猶免于吳起衛鞅刻厲之禍
亦幸而生于王者之世夫

趙子騷弦錄序

孟子告滕世子滕將五十里猶可以爲善國引
書若藥不瞋眩厥疾不瘳問者曰滕地瘠小殘
弱因之可幸旦夕授之瞋眩恐更不勝答者曰
有國必有土有土必有民有民必有受藥者顧

藥物何如耳然則以何爲藥物乎曰以性善爲
藥物然則孰爲此方者曰先天地以來卽有性
善一方伏羲視卦氣神農化毒草軒轅蓋井田
封建所以利生成世皆是物也至堯著其方授
舜曰允執其中已而嘆曰四海困窮矣舜以授
禹而湯文王周公孔子守之孟子識其大者故
與滕世子道性善稱堯舜而曰滕可爲性善之

國至問所以爲國大畧復升田正經界十一堯
舜之道也曰芒此則藥性善矣復何所苦而瞑
眩與曰舜言之矣人心惟危道心惟微惟精惟
一道心者藥物也其性至微人心起則常與道
心爲瞑眩不勝則危善用藥者必致精極一隨
瞑眩攻之而不止時必有揺手反唇止其藥物
者鎮之曰無稽之言勿聽蓋危之也此孟子所

謂暴君汙吏必慢其經界者何言暴汙惠君良
吏驟爲投此亦有憤憤而不敢遽受者何也皆
所謂因之可幸旦夕者也趙君侂一治滕偉容
幹精吏事廉而有威苟因之旦夕幸無事而去
甚易愾然曰滕病痼吾不藥之無起時吾欲用
滕子之國正經界復井田復次而限田未遽可
也歲凶不食何以食歲逋不償何以償歲流徙

不歸何以歸我知之矣豪石受民所寄田失稅而移責旱稻民有田不能深治饑則徙而他之田益以三賦益以適心令自名其田戶廢之無寄隱而後可豪者懼撓之曰若而年固已度田不遠矣間以祿大吏君朝上議立行身與豪貴人鬪而馳田中瞋目赭面奮髯怒號豪不可當辟易就丈無幾何而籍定則又羣洶而蜚言

大吏君曰此正所謂無稽之言也吾執吾中已而人心定大吏莫如君何凡得隱田并墾除數千頃買牛千頭活饑民數萬人歸流民數千戶始至倉見糧三年積粟止十二石乃課民樹桑粟有貴人子毀其一株輒收捕償樹十而舍之後至數萬株所至桑陰常滿城壕半乃有蓮荷香若南方亭隧盡斤垣樹表列賓舍有序學士

誦歌市賈無飾男女廉貞休休于于河洛之間
蔥然一善國也由今思之滕之人經幾瞋眩而
至此雖然不瞋眩則不受藥瞋眩則其受藥處
也受藥則其性善也趙君可謂善醫國者問者
曰能醫天下乎曰有命國小而天下大管仲子
產吳起申不害商鞅諸葛亮王猛皆以藥瞋眩
其國下疑而上信故勝而厥功王安石信于其

君所用藥物亦種種當宋人病而其時與爲瞑
眩者韓富司馬公諸人也此皆所謂惠君良吏
者卒以不勝而止世遂謂安石無能醫天下矣
而其治鄞也固效彼固稱用堯舜之道者然則
後滕治於天下可乎趙君所入用者皆世所語
王道藥也而氣勢形格常以霸藥見疑夫有霸
藥之疑而令天下瞑眩知其於治何如也雖然

趙君固知學者歸其鄉處秦阡陌間歌出風益
繕其性更出而授業必有神而化之天下霍然
病已者矣

趙侍一鄉行錄序

趙子鄉行錄錄真寧父老子弟以趙吏部邦清
有功德其鄉而草笠徒行闕於儀禮相與共土
其守吏求以車馬優重趙君也父老意良厚趙

君之去吏部也同官予鄉吳君仁度坐爲君疏
理調南漸徙至太僕使歸示予斯錄予謂趙君
賢者而其鄉德之如是然其鄉之大老在兩都
者不下五六公吳君何不爲趙君一言而令坐
廢無乃非其鄉行意乎吳君笑曰嘗以語其鄉
乃更有不好趙君者問故吳君不言嘻予知之
矣將如孔子所調鄉人之善者好之而不善者

惡之與是言曰不然元譏則道言者亦皆忠信
廉潔之老非爲不善者也予益怪之久而驛之
矣夫所謂忠信廉潔者微孟軻氏所謂其鄉之
原人與鄉原之所至不好者狂狷趙君將無得
爲狂且狷與若此或非所謂善者惡之而向時
父老言趙君有功德不可徒行以辱之者乃誠
善者之好也嗟夫趙君高氣異材天下有識者

聞而好之。意相近也。而其鄉老在朝者。惟恐趙君不徒行在野者。惟恐趙君不得與。是何其鄉用情之遠與。嗟夫。一遂昌令也。上六年計求去。南考功某曰。遂昌有關係人。何得便去。予竟去。未嘗一日之官矣。又三年計而溫中丞出。故相揭袖中曰。遂昌有言宜。遂其高尚。二公皆秦人也。而異同若是。其又能盡好趙君與。且方今士

大夫進退以黨秦楚北而吳越南趙君前失越
相意以去天下意君秦人也去兩秦之大老曾
莫爲援然後知趙君天下士也鄉人難與爲行
不能不與爲行獨秦而已耶

太平山房集選序

通人之言曰善觀人者不觀其人而觀其人之
天相千里馬者取其精遺其粗見其內而忘其

外以此謂之天機子言之矣富貴貧賤不以其
道得之君子有所不去不處以成名于其仁蓋
造次必於是而顛沛必於是是不有天機存焉
者乎不然而曰必於是是固有不可得而必者
何也其外而慥焉者耳故曰言語者仁之文也
行事者仁之施也行莫大乎節行而言莫大乎
文章二者皆所以顯仁而藏其用於世固非以

成名也而名不厭成 國朝制天下當以此厲
臣子忠孝之節言之羅公彛正論大臣起復非
是後百餘年爾瞻鄒公繼之羅公止于賤貧公
顛沛殆甚前後公而必於是者固亦有人焉而
公之名以成何也天下國家可均也爵祿可辭
而白刃可蹈中庸不可能中庸者天機也仁也
去仁則其智不清智不清則天機不神乃至有

顛沛可必造次不可必貧賤富貴之際終其身
有可以爲名不可得而成名者公於其際固屢
矣仁存其心如將造次而弗離然則公其天機
勝與何以知之以其文知之公所爲奏議傳贊
書論詩歌無慮若干卷大抵皆言均天下國家
蹈白刃辭爵祿之事而未嘗不出乎道中庸之
意正而不驕勞而不離發瀆譏切大臣之事詘

然而止餘多以大雅寬然之思感動主上所
傳記悲美多以表發道術感慨烈行幽憂所不
能平與學道人酬答常治其漏至言修曰必有
以悟言悟曰必有以修言悟修曰必其中有真
而後可蓋學道人言多出乎是獨公言之如水
玉之清以明如芝蘭之馨如英英乎其出雲而
昭昭乎其發春也令人挹而愛之不可忘受而

體之不可易緒爲詩歌寥然以和公其天機勝者與蓋予童子時從明德夫子遊或穆然而咨嗟或熏然而與言或歌詩或鼓琴予天機冷如也後乃畔去爲激發推蕩歌舞誦數自娛積數十年中腐絕而天機死蓋晚而得見公文乃始憬然嘆曰是何仁者之心而智者之言如相馬者吾今猶未能定其色知其人天之天而已公固

謂予曰非子莫爲序吾文者因爲欣言之如此
固將有事乎此而就正焉非如世所云以托公
千秋之名而已也

調象庵集序

萬物當氣厚材猛之時奇迫怪窘不獲急與時
會則必潰而有所出趣而有所之常務以快其
情結過當而後止久而徐以平其勢然也是故

衝孔動樞而有厲風破隘蹈決而有潼河已而
其音泠泠其流紆紆氣往而旋才距而安亦人
情之大致也情致所極可以寧道可以忘言而
終有所不可忘者存乎詩歌序記詞辯之間固
聖賢之所不能遺而英雄之所不能晦也東吳
鄒公彥吉著調象庵集數十卷以余所好急取
其詩而諷之已異焉當其興屬而起瀕洞合沓

勃聿琤璫可使霆發電睽魚跳鳥瀾猝不可得
而當也逮其法至而行則復倚儷澹淡切迭稽
詰若晴雲穆雨堅韋良駟逝不可得而厭也文
則皆各音巖川之環其前而通人選賓之駢其
後彪炳渙汗要千足傳而大致有動於余衷者
蓋公才具高偉於世故亶亶之業開濟有餘而
心目太明神骨太峻於貴倨無所可下於夷伍

無所可借用此率意而酬殆非頻頻所了蓋自
是公之進退無恒而天山有筮矣嗟夫有高才
而鮮賢仕其與能靖者與折節抵巇非公所習
則其鬱觸噴逆而雜出于詩歌文記之間雖談
世十一譚趣十九而終焉英英沍沍有所不能
忘者蓋其情也至於今四海人士鮮不引重公
者然猶大其才而高其氣則當時之嶽嶽一世

何如矣雖然世人爲其不可傳者而公爲其可
傳者噫而風飛怒而河奔豈能阨之於彼而不
能不縱之於此然公復自詫愚公而謂余曰平
生此道恒以酒廢病廢游廢填更以事佛廢此
殆不然公文字言酒言病言游言佛者疊累而
是公之廢無乃其所爲興者與聲音出乎虛意
象生於神固有迫之而不能親遠之而不能去

者聞元成本寧二公當過公所其亦以是諭之
爾

祿宏先生戒殺文序

春秋介葛聞牛鳴知悲其子三犧矣賓孟嘆雄
雞自斷其羽悲而疑之后予從太常視一犧齒
長矣常先祭數日涕下不食引之不行數以免
後乃數人負之至庖門竟自啗鳴躑躅死不成

爲犧何其信也夫以禮死而痛若是况乎以食
折財竟者乎夫太古食鮮如豺獾相祭已亂矣
中古粒食而不絕鮮至蜂蟬螳子亦爲聖人所
食豈不痛哉此亦聖人生長東土習味肉恕不
能爲之斷矣末流至使肉食君子肥不可動昏
不可靈又使貧士流涎餽啖其側此非膏脂之
累乃聖人不制之過也幸有西方神人因機止

殺有如萬一禽魚復安橫目之心淨矣至云無
始以來遞代相食取報人無信焉徵於余郡南
青雲鄉有獵翠少年乃爲一美人死後美人死
時有大翠鳥如鷺出戶飛余先祖伯清聞之嘆
曰心精則化寧循其端翠精於怨猶能報人况
靈於翠者乎遂素食草履常步耦耕斷肉人珠
翠飾恐犯爲人所化牛馬蛤翠也今何可得乎

善哉祿宏先生爲諸蟲流涕鴻臚孫君又爲精
信廣流傳焉粒爲癰疽勸方度殺業也

光霽亭草叙

顯祖得爲祠官南來客言一林遊適讀書之美
此皆非顯祖所以喜也而喜傳堂上二老先生
記曰君子尊德性而道問學溫柔敦厚詩教也
潔靜精微易教也二老先生之德性問學非末

學所能遂窺亦可謂之尊而道矣以語吾鄉講學之士鄒比部等因問曰爾何以窺二公之能尊且道乎顯祖曰觀其容讀其言其容皆溫良恭儉讓者也此易識耳其言則方公之詩敦乎詩周公之文精乎易衆多以爲然然方公之詩已有息機堂集行於世爲徵而周公之文未爲世所窺顯祖雖記其論說數條傳於人而平生

雅不能言口旨未暢乃時時謁周公乞梓之亦
私欲以信吾言也而今果有光霽亭集行於世
捧而讀之乃私嘆曰吾乃今知周公之所以爲
文也恨吾齒之已壯材之已固無繇進於此道
也童子之心虛明可化乃實以俗師之講說薄
士之制義一入其中不可復出使人不見泠泠
之適不聽純純之音是故爲諸生八年而後乃

舉于鄉又十三年而後乃進于庭素學迂而大義不明也因思世人受此病者甚衆獨無秦越人之術副其內藥而洗之令別生美氣也雖然讀周公之文亦可以知治本之技矣知文者當亦有以信斯言也夫

張氏紀畧序

晉人有言比來離別常數日作惡余爲寬言之

日生別猶可死別何若年過耳順愈不喜逆或
客幸無以悲傷事相聞卽世間悲傷文字亦不
必見也何也其敘述世家坎坷流連乃至若數
冬而不遵一春恒夜而不經一旦者固却無視
視亦不竟早衰恐神傷也屬者客乃以崑山張
元長所志六世以來行畧見示則有不忍不視
視而不忍不竟者竟而去之去之而復在几閣

間排惻慨嘆一月而神弗怡客曰夙若某若某者皆嘗述其世家以煩子目未見子不响然而豔也讀張氏畧而泫然傷之太比于人情與余解之曰固也吾亦世人耳世之所喜吾得不喜世之所悲吾得不悲且彼其家男子而世纓組婦女而世禕翟外內休融壽考咸遂何德而至斯張之世德詎遠于斯與何久瘁而不豔也客

曰何如曰其六世祖道瑾起于贅壻立而與婦
願歸孝舅力田以有其子德聲爲縣從事輒自
免自領賦萬石以休其同人迂騎而避少婦之
涉者歲晚則與婦方浣泉紉緼以衣里中癸孺
廣糜餌以飼囚有德者矣而子諸生唐文乃二
十二歲而死且死衣冠強起坐使畫工傳之曰
後人庶知吾齋志以歿乎妻爲盧節婦也撫其

子抑甫六歲時秋夜起見月華雲成五色蔽天
呼母盧起視驚喜令兒整襟肅拜見短髮蕭蕭
印月下慟欲絕爲述亡考讀書時事相抱痛哭
而雲中雁聲裂然嗟乎聞此而有不泫然者情
耶抑甫爲諸生已復棄去而其婦晉孺人歲祭
掃必戒必泣曰先姑有言見孫奉養有盡但綠
楊紙錢年年如故則兒家之祥也至抑甫有子

諸生宗翰能文章有當世之志幸乃五十二而
貢于鄉矣終六十二而不受一命之榮婦季行
年八十矣而爲其子食貧緯纈不能自休以歿
此豈不足悲乎生子也才如元長發舒五世之
鬱伊將是焉在而爲諸生且五十年竟以病廢
至云母子之間徒以聲相聞者十四年母病時
以手按母肌肉消滅含泣大恐而母夫人猶喘

喘好語曰恨兒不見吾面猶未有死理也斯語也聞之而不亦悲乎天下有目者皆欲與元長目不可得矣有子鐵兒而殤有女孝仲秀慧端婉曉書傳大義所謂閨閣中鍾子期也爲孟家婦幾年而復殤天之困元長也不愈悲乎凡此數端者客以爲何如也客曰若然誠悲矣安知前所云世家者之先容愈張氏而張氏後乃終

不如前數世家耶夫冬之必有春而夜之必有
旦亦天道也予爲嘻然久之曰固也語不云乎
天不可與期道不可與謀元長且置無悲需諸
季之後幸乃如客言可也

蘭堂摘粹序

我完素江侯以文章家起大閩之西而長予郡
之金邑一時吏治用決裂無所顧護爲好予獨

喜侯顏敦而氣冲有以下人一見知其脫羣世
俗吏習動于醲醇蓋暮而其政已效矣治士大
夫禮而治民憲韋朴之楚不聞于境外而稽比
以時訟無鍰罰工作之煩然常有所愧悔至爲
希少蓋嚮見侯之容知其循且良焉必矣雖然
殆必學殖與久之授其爲諸生時所集諸家言
蓋抉玄而標其粹者予受之歎曰侯殆有進于

道者與此其於古人之書也不皆感乎日而感乎心然且章而摘之句而剽之編連而序之固將爲夫世之學者磅礴徑省有可以給取乎是而爲風所流纈意不能無愛之雖以予之衰且老而一接乎離離諸家之言感侯之勤讀而乙之損而三之尤不能無愛也昔人之喻唾者大如霧雨細若珠璣出乎人之精神一也江漢之

瀾漱而爲溝取于美田引其涓涓泠華出泉凡
以汰故爲鮮不可謂非其全矣嘗試語之六經
儒者之辨莫燦于周孔天人之際爲持其平若
夫老莊之屬人而之天管韓之屬天而之人凡
世之蘄有所立言成書托名字者必皆有一乎
是學士得而精之通其數言舉可以攝理事而
施于世世固莫有致其精焉者予仰之侯之學

殖矣刑名短長之說不足相誘動而其治獨以
俞俞歐歐凝重以薄常出乎道德之意並諸家
所以表術事形物機者侯若皆有所得之異時
所施用當大著此以薄示其精烈令學者亦有
以窺天地之全百家不可廢也

超然樓集後序

於越通于吳其地文物而風美而處乃與江右

隣質以野其悞旣曠于法物之聽而吏於斯者
亦無以與於文章之觀蓋平昌令局于面牆而
無與語者五年于茲矣天幸於越夫人臨之始
與士民約教以鄉比之長如周官禁其佚而敖
者至於童子小學各有程吏率惟謹平昌令捧
令而嘆曰公之文其在茲乎屬者以叅知天下
事其以文化成也何有郡丞許公聞之忻然曰

未也公之文有以開萬世者乃帥十縣令稽首
而求發覆焉久之乃得其超然樓所爲文各體
具是十縣令起而卒黨焉大者若雲漢委迤于
天而星含景流也若山之延爽起沒于地而烟
霞草木禽魚光怪響象莫不儲以興也若覲九
奏雲咸淫于舞馬歌嬪而短章若奇音獨奏其
淒鏘詘然又若孤嶂寒潭之秀以澄而氷霰之

泠歷也蓋十縣令始知公之文有以極古今之
變化見天地之大全而平昌令一旦出面牆而
遊通都神明爲之練汰心容爲之解舒舞之蹈
之不可得而言矣旣而頓首曰試言之竊意超
然有五難有殊絕秀卓偉厲之資而後可以竟
業公有其資一也竟學然後其資庶以有所立
於時而不廢公無所不學而學必深二也孤絕

而興者危得之而已後矣公生而有忠父孝兄
家國之務闡若性成三也雖滯而動其中外阻
山川閒遊之觀則不適吳故文物風美之地也
遊客大雅將朝夕焉意所至而開四也若宦而
偏窮偏通無屈折頓挫之迹亦不能有所憤會
而成文公外朗而中已蒼世有知有不知者物
之態色時之機趣無所不經而盡菀蓄以遊於

文五也公有此五者其覩於大全而變化極也
超然不亦宜乎若平昌令者生于質而野之鄉
學而廢于賄仕而偏於窮外無所發皇而中有
所底滯雖得公之文師之而萬一也亦可得而
超然也乎哉于是九邑之令拱手而嘆曰平昌
令可謂汙而自知不阿其好者矣因敬梓而傳
之殿以平昌令之言附不朽云